

O beatum incendium,  
Et ardens desiderium !  
O dulce refrigerium,  
Amare Dei Filium !

Jesu, flos matris virginis  
Amor nostræ dulcedinis,  
Tibi laus, honor numinis,  
Regnum beatitudinis,

Veni, veni, Rex optime,  
Pater immensæ gloriæ,  
Affulge menti clarius,  
Jam expectatus sæpius.

Jesu sole serenior,  
Et balsamo suavior,  
Omni dulcore dulcior  
Cæteris amabilior.

Cujus gustus sic afficit,  
Cujus odor sic reficit,  
In quo mea mens deficit,  
Solus amanti sufficit.

Tu mentis delectatio,  
Amoris consummatio ;  
Tu mea gloriatio,  
Jesu mundi salvatio.

Mi dilecte, revertere,  
Consors paternæ dexteræ :  
Hostem vicisti prospere,  
Jam cœli regno fruire.

Sequar te quoquo ieris,  
Mihi tolli non poteris,  
Cum meum cor abstuleris,  
Jesu laus nostri generis,

Cœli cives, occurrere,  
Portas vestras attollite  
Triumphatori dicite,  
Ave, Jesu rex inclite.

Rex virtutum, rex gloriæ,  
Rex insignis victoriæ,  
Jesu largitor veniæ,  
Honor cœlestis patriæ,

Tu fons misericordiæ,  
Tu veræ lumen patriæ :  
Pelle nubem tristitiæ,  
Dans nobis lucem gloriæ.

Te cœli chorus prædicat,  
Et tuas laudes replicat :  
Jesus orbem lætificat,  
Et nos Deo pacificat.

Jesu in pace imperat,  
Quæ omnem sensum superat :  
Hanc mea mens desiderat,  
Et ea frui properat.

Jesu ad Patrem rediit,  
Cœleste regnum subiit :  
Cor meum a me transiit,  
Post Jesum simul abiit.

Quem prosequamur laudibus,  
Votis, hymnis, et precibus :  
Ut nos donet cœlestibus,  
Secum perfrui sedibus. Amen.

### RHYTHMICA ORATIO AD UNUM QUODLIBET MEMBRORUM CHRISTI PATIENTIS ET A CRUCE PENDENTIS.

#### AD PEDES.

Salve, mundi salutare :  
Salve, salve, Jesu chære,  
Cruci tuæ me aptare  
Vellem vere, tu scis quare  
Da mihi tui copiam.

Ac si præsens sis accedo,  
Imo te præsentem credo.  
O quam mundum hic te cerno !  
Ecce tibi me prosterno :  
Sis facilis ad veniam.

Clavos pedum, plagas duras.  
Et tam graves impressuras  
Circumplector cum affectu,  
Tuo pavens in aspectu,  
Tuorum memor vulnerum.

Grates tantæ charitati,  
Nos agamus vulnerati.  
O amator peccatorum,  
Reparator confractorum :  
O dulcis pater pauperum !

Quidquid est in me confractum  
Dissipatum, aut distractum,  
Dulcis Jesu, totum sana,  
Tu restaura, tu complana,  
Tam pio medicamine.

Te in tua cruce quæro,  
Prout queo, corde mero ;  
Me sanabis hic, ut spero :  
Sana me, et salvus ero,  
In tuo lavans sanguine,

Plagas tuas rubicundas,  
Et fixuras tam profundas,  
Cordi meo fac inscribi,  
Ut configar totus tibi,  
Te modis amans omnibus.

Dulcis Jesu, pie Deus,  
Ad te clamo licet reus :  
Præbe mihi te benignum,  
Ne repellas me indignum  
De tuis sanctis pedibus.

Coram cruce procumbentem,  
Hosque pedes complectentem,  
Jesu bone, non me spernas,  
Sed de cruce sancta cernas  
Compassionis gratia.

In hac cruce stans directe,  
Vide me, o mi dilecte,  
Ad te totum me converte :  
Esto sanus, dic aperte,  
Dimitto tibi omnia.

#### AD GENUA.

Salve, Jesu, rex sanctorum,  
Spes votiva peccatorum,  
Crucis ligno tanquam reus  
Pendens homo verus Deus,  
Caducis nutans genibus.

O quam pauper ! o quam nudus !  
Qualis est in cruce ludus  
Derisorum totus factus,  
Sponte tamen, non coactus,  
Attritus membris omnibus !

Sanguis tuus abundanter,  
Fusus, fluit incessanter,  
Totus lotus in cruore,  
Stas in maximo dolore,  
Præcinctus vili tegmine.

O Majestas infinita !  
O egestas inaudita !  
Quis pro tanta charitate,  
Quærit te in veritate,  
Dans sanguinem pro sanguine ?

Quid sum tibi responsurus,  
Actu vilis, corde durus ?  
Quid rependam amatori,  
Qui elegit pro me mori,  
Ne dupla morte morerer ?

Amor tuus amor fortis,  
Quem non vincunt jura mortis :  
O quam pia me sub cura,  
Tuæ foves in pressura,  
Ne morsu mortis vulnerer !

Ecce tuo præ amore,  
Te complector cum rubore :  
Me coapta diligenter,  
Tu scis causam evidentem,  
Sed suffer et dissimula.

Hoc quod ago non te gravet,  
Sed me sanet et me lavet  
Inquinatum et ægrotum,  
Sanguis fluens hic per totum,  
Ut non supersit macula.

In hac cruce te cruentum,  
Te contemptum et distentum,

Ut requiram, me impelle,  
Et hoc imple meum velle,  
Facturus quod desidero.

Ut te quæram mente pura,  
Sit hæc mea prima cura.  
Non est labor, nec gravabor  
Sed sanabor et mundabor,  
Cum te complexus fuero.

## AD MANUS.

Salve, Jesu, pastor bone,  
Fatigatus in agone,  
Qui per lignum es distractus,  
Et ad lignum es compactus,  
Expansis sanctis manibus.

Manus sanctæ, vos avete,  
Rosis novis adimplete,  
Hos ad ramos dure junctæ,  
Et crudeli ferro punctæ

●●● Tot guttis decurrentibus  
Ecce fluit circumquaque  
Manu tua de utraque,  
Sanguis tuus copiose,  
Rubicundus instar rosæ,  
Magnæ salutis pretium.

Manus clavis perforatas,  
Et cruore purpuratas,  
Corde primo præ amore,  
Sitibundo bibens ore,  
Cruoris stillicidium.

O quam large te exponis  
Promptus malis atque bonis!  
Trahis pigros, pios vocas,  
Et in tuis ulnis locas,  
Paratus gratis omnibus.

Ecce tibi me præsentō,  
Vulnerato et cruento :  
Semper ægris misereris ;  
De me ergo ne graveris  
Qui præsto es amantibus,

In hac cruce sic intensus,  
In te meos trahe sensus,  
Meum posse, velle, scire,  
Cruci tuæ fac servire,  
Me tuis apta brachiis,

In tam lata charitate  
Trahe me in veritate  
Propter crucem tuam almam,  
Trahe me ad crucis palmam,  
Dans finem meis vitiis.

Manus sanctæ, vos amplector,  
Et gemendo condelector ;  
Grates ago plagis tantis,  
Clavis duris, guttis sanctis,  
Dans lacrymas cum osculis

In cruore tuo lotum,  
Me commendo tibi totum :  
Tuæ sanctæ manus istæ  
Me defendant, Jesu Christe,  
Extremis in periculis,

PATROL. CLXXXIV.

## AD LATUS

Salve, Jesu, summe bonus  
Ad parcendum nimis pronus :  
Membra tua macilenta  
Quam acerbe sunt distenta  
In ramo crucis torrida !

Salve, latus salvatoris  
In quo latet mel dulcoris,  
In quo patet vis amoris  
Ex quo scatet fons cruoris,  
Qui corda lavat sordida.

Ecce tibi appropinquo,  
Parce, Jesu, si delinquo :  
Verecunda quidem fronte,  
Ad te tamen veni sponte,  
Scrutari tua vulnera.

Salve, mitis apertura,  
De qua manat vena pura,  
Porta patens et profunda  
Super rosam rubicunda  
Medela salutifera.

Odor tuus super vinum,  
Virus pellens serpentinum ;  
Potus tuus, potus vitæ :  
Qui sititis, huc venite,  
Tu dulce vulnus aperi

Plaga rubens, aperire.  
Fac cor meum te sentire,  
Sine me in te transire.  
Vellem totus introire ;  
Pulsanti pande pauperi.

Ore meo te contingo,  
Et ardentem ad me stringo :  
In te meum cor intingo,  
Et ferventi corde lingo ;  
Me totum in te trajice.

O quam dulcis sapor iste !  
Qui te gustat, Jesu Christe,  
Tuo victus a dulcore,  
Mori posset præ amore,  
Te unum amans unice,

In hac fossa me reconde,  
Infer meum cor profunde,  
Ubi latens incalescat,  
Et in pace conquiescat  
Nec prorsus quemquam timeat

Hora mortis meus flatus  
Intret, Jesu, tuum latus,  
Hinc expirans in te vadat ;  
Ne hunc leo trux invadat,  
Sed apud te permaneat.

## AD PECTUS.

Salve, salus mea Deus,  
Jesu dulcis amor meus :  
Salve, pectus reverendum,  
Cum tremore contingendum  
Amoris domicilium.

Ave, thronus Trinitatis,  
Arca lætæ charitatis,

Firmamentum infirmatis,  
Pax et pausa fatigatis,  
Humilium triclinium.

Salve, Jesu reverende,  
Digne semper inquirende ;  
Me præsentem hic attende,  
Accedentem me succende,  
Præcordiali gratia.

Pectus mihi confer mundum,  
Ardens, pium, gemebundum,  
Voluntatem abnegatam,  
Tibi semper conformatam,  
Juncta virtutum copia.

Jesu dulcis, pastor pie,  
Fili Dei et Mariæ,  
Largo fonte tui cordis,  
Fœditatem meæ sordis,  
Benigne pater dilue.

Ave, splendor et figura  
Summi Dei genitura,  
De thesauris tuis plenis  
Desolatis et egenis  
Munus clementer perflue.

Dulcis Jesu Christi pectus,  
Tuo fiam dono rectus,  
Absolutus a peccatis,  
Ardens igne charitatis  
Ut semper te recogitem

Tu abyssus es sophiæ,  
Angelorum harmoniæ  
Te collaudant, ex te fluxit  
Quod Joannes cubans suxit :  
In te fac ut inhabitem.

Ave, fons benignitatis,  
Plenitudo deitatis  
Corporalis in te manet :  
Vanitatem in me sanet  
Quod tu confers consilium.

Ave, verum templum Dei ;  
Precor, miserere mei :  
Tu totius arca boni,  
Fac electis me apponi,  
Vas dives, Deus omnium.

## AD COR

Summi Regis cor, aveto,  
Te saluto corde læto,  
Te complecti me delectat.  
Et hoc meum cor affectat,  
Ut ad te loquar, animes.

Quo amore vincebaris,  
Quo dolore torquebaris,  
Cum te totum exhaurires,  
●●● Ut te nobis impartires,  
Et nos a morte tolleres ?

O mors illa quam amara,  
Quam immitis, quam avara ;  
Quæ per cellam introivit,  
In qua mundi vita vivit.  
Te mordens, cor dulcissimum ?

Propter mortem quam tulisti  
Quando pro me defecisti,  
Cordis mei cor dilectum,  
In te meum fer affectum,  
Hoc est quod opto plurimum.

O cor dulce prædilectum,  
Munda cor meum illectum,  
Et in vanis induratum;  
Pium fac et timoratum,  
Repulso tetro frigore.

Per medullam cordis mei,  
Peccatoris atque rei,  
Tuus amor transferatur,  
Quo cor totum rapiatur  
Languens amoris vulnere.

Dilatate, aperire,  
Tanquam rosa fragrans mire,  
Cordi meo te conjunge,  
Unge illud et compunge;  
Qui amat te, quid patitur?

Quidnam agat nescit vere,  
Nec se valet cohibere,  
Nullum modum dat amori,  
Multa morte vellet mori,  
Amore quisquis vincitur.

Viva cordis voce clamo,  
Dulce cor; te namque amo:  
Ad cor meum inclinare,  
Ut se possit applicare,  
Devoto tibi pectore.

Tuo vivat in amore  
Ne dormitet in torpore.  
Ad te oret, ad te ploret  
Te adoret, te honoret,  
Te fruens omni tempore.

Rosa cordis, aperire,

Cujus odor fragrat mire,  
Te dignare dilatate,  
Fac cor meum anhelare  
Flamma desiderii.

Da cor cordi sociari,  
Tecum, Jesu, vulnerari.  
Nam cordi similatur,  
Si cor meum perforatur  
Sagittis improperii.

Infer tuum intra sinum  
Cor ut tibi sit vicinum,  
In dolore gaudioso  
Cum deformi specioso,  
Quod vix se ipsum capiat  
Hic repauset, hic moretur,  
Ecce jam post te movetur,  
Te ardentem vult sitire.

Jesu, noli contraire,  
Ut bene de te sentiat.

AD FACIEM.

Salve, caput cruentatum,  
Totum spinis coronatum,  
Conquassatum, vulneratum,  
Arundine verberatum,  
Facie sputis illita.

Salve, cujus dulcis vultus,  
Immutatus et incultus,  
Immutavit suum florem,  
Totus versus in pallorem  
Quem (81) cœli curia.

Omnis vigor atque viror  
Hinc recessit, non admiror,  
Mors apparet in aspectu  
Totus pendens in defectu,  
Attritus ægra macie.

Sic affectus, sic despectus,  
Propter me sic interfectus,  
Peccatori tam indigno  
Cum amoris intersigno  
Appare clara facie.

In hac tua passione,  
Me agnosce, Pastor bone,  
Cujus sumpsit mei ex ore,  
Haustum lactis cum dulcore  
Præ omnibus deliciis.

Non mel reum asperneris.  
Nec indignum dedigneris,  
Morte tibi jam vicina,  
Tuum caput hic inclina,  
In meis pausa brachiis.

Tuæ sanctæ passioni  
Me gauderem interponi,  
In hac cruce tecum mori:  
Præsta crucis amatori,  
Sub cruce tua moriar.

Morte tuæ tam amœnæ;  
Grates ago, Jesu chare;  
Qui es clemens, pie Deus,  
Fac quod petit tuus reus.  
Ut absque te non finiar.

Dum me mori est necesse,  
Noli mihi tunc deesse;  
In tremenda mortis hora  
Veni, Jesu, absque mora,  
Tuere me et libera.

Cum me jubes emigrare,  
Jesu chare, tunc appare:  
O amator amplectende,  
Temetipsum tunc ostende  
In cruce salutifera.

## ORATIO DEVOTA

### AD DOMINUM JESUM, ET B. MARIAM MATREM EJUS.

**OS** Summe summi tu Patris unice,  
Mundi faber et rector fabricæ  
Pietatis respectu deicæ,  
Peccatores afflictos respice,  
Pie Pater.

Summa summi tu Mater Filii  
Clavem nostri tenens auxilii,  
Fove tui lacte consilii,  
Peregrinos hujus exilii,  
Pia Mater.

Consolentur, o bone Domine,  
Respirantes in tuo nomine,  
Qui pro mundi tollendo crimine,  
Dignatus es nasci de virgine,  
Matris Pater

Consolentur, o bona Domina.  
Sitientes tua solamina,

(81) Adde cæpit, vel quid simile.

**A** De qua sola felice femina  
Prædicantur hæc duo nomina,  
Virgo Mater.

O figura Patris substantiæ!  
Tu es splendor paternæ gloriæ,  
Tu es verum lumen justitiæ,  
De quo manat totius gratiæ  
Plenitudo.

O Regina regni Davidici!  
Tu es virga floris Dominici!  
Tu es arca panis angelici,  
De quo nostra meretur refici  
Solitudo.

Virtus Patris et sapientia,  
**B** Suaviter disponens omnia  
Tu et Pater una substantia.  
Æquus honor, eadem gloria